

華嚴經淨行品偈頌

菩薩在家，當願眾生，知家性空，免其逼迫。孝事父母，當願眾生，
 善事於佛，護養一切。妻子集會，當願眾生，怨親平等，永離貪著。
 若得五欲，當願眾生，拔除欲箭，究竟安隱。伎樂聚會，當願眾生，
 以法自娛，了伎非實。若在宮室，當願眾生，入於聖地，永除穢欲。
 著瓔珞時，當願眾生，舍諸偽飾，到真實處。上升樓閣，當願眾生，
 升正法樓，徹見一切。若有所施，當願眾生，一切能舍，心無愛著。
 眾會聚集，當願眾生，舍眾聚法，成一切智。若在厄難，當願眾生，
 隨意自在，所行無礙。舍居家時，當願眾生，出家無礙，心得解脫。
 入僧伽藍，當願眾生，演說種種，無乖諍法。詣大小師，當願眾生，
 巧事師長，習行善法。求請出家，當願眾生，得不退法，心無障礙。
 脫去俗服，當願眾生，勤修善根，舍諸罪軛。剃除鬚髮，當願眾生，
 永離煩惱，究竟寂滅。著袈裟衣，當願眾生，心無所染，具大仙道。
 正出家時，當願眾生，同佛出家，救護一切。自歸於佛，當願眾生，
 紹隆佛種，發無上意。自歸於法，當願眾生，深入經藏，智慧如海。
 自歸於僧，當願眾生，統理大眾，一切無礙。受學戒時，當願眾生，
 善學於戒，不作眾惡。受闍梨教，當願眾生，具足威儀，所行真實。
 受和尚教，當願眾生，入無生智，到無依處。受具足戒，當願眾生，
 具諸方便，得最勝法。若入堂宇，當願眾生，升無上堂，安住不動。
 若敷床座，當願眾生，開敷善法，見真實相。正身端坐，當願眾生，
 坐菩提座，心無所著。結跏趺坐，當願眾生，善根堅固，得不動地。
 修行于定，當願眾生，以定伏心，究竟無餘。若修於觀，當願眾生，
 見如實理，永無乖諍。舍跏趺坐，當願眾生，觀諸行法，悉歸散滅。
 下足住時，當願眾生，心得解脫，安住不動。若舉於足，當願眾生，
 出生死海，具眾善法。著下裙時，當願眾生，服諸善根，具足慚愧。

整衣束帶，當願眾生，檢束善根，不令散失。若著上衣，當願眾生，獲勝善根，至法彼岸。著僧伽梨，當願眾生，入第一位，得不動法。手執楊枝，當願眾生，皆得妙法，究竟清淨。嚼楊枝時，當願眾生，其心調淨，噬諸煩惱。大小便時，當願眾生，棄貪瞋癡，蠲除罪法。事訖就水，當願眾生，出世法中，速疾而往。洗滌形穢，當願眾生，清淨調柔，畢竟無垢。以水盥掌，當願眾生，得清淨手，受持佛法。以水洗面，當願眾生，得淨法門，永無垢染。手執錫杖，當願眾生，設大施會，示如實道。執持應器，當願眾生，成就法器，受天人供。發趾向道，當願眾生，趣佛所行，入無依處。若在於道，當願眾生，能行佛道，向無餘法。涉路而去，當願眾生，履淨法界，心無障礙。見升高路，當願眾生，永出三界，心無怯弱。見趣下路，當願眾生，其心謙下，長佛善根。見斜曲路，當願眾生，舍不正道，永除惡見。若見直路，當願眾生，其心正直，無諂無誑。見路多塵，當願眾生，遠離塵坌，獲清淨法。見路無塵，當願眾生，常行大悲，其心潤澤。若見險道，當願眾生，住正法界，離諸罪難。若見眾會，當願眾生，說甚深法，一切和合。若見大柱，當願眾生，離我諍心，無有忿恨。若見叢林，當願眾生，諸天及人，所應敬禮。若見高山，當願眾生，善根超出，無能至頂。見棘刺樹，當願眾生，疾得翦除，三毒之刺。見樹葉茂，當願眾生，以定解脫，而為蔭映。若見華開，當願眾生，神通等法，如華開敷。若見樹華，當願眾生，眾相如華，具三十二。若見果實，當願眾生，獲最勝法，證菩提道。若見大河，當願眾生，得預法流，入佛智海。若見陂澤，當願眾生，疾悟諸佛，一味之法。若見池沼，當願眾生，語業滿足，巧能演說。若見汲井，當願眾生，具足辯才，演一切法。若見湧泉，當願眾生，方便增長，善根無盡。若見橋道，當願眾生，廣度一切，猶如橋樑。若見流水，當願眾生，

得善意欲，洗除惑垢。見修園圃，當願眾生，五欲園中，耘除愛草。
見無憂林，當願眾生，永離貪愛，不生憂怖。若見園苑，當願眾生，
勤修諸行，趣佛菩提。見嚴飾人，當願眾生，三十二相，以為嚴好。
見無嚴飾，當願眾生，舍諸飾好，具頭陀行。見樂著人，當願眾生，
以法自娛，歡愛不舍。見無樂著，當願眾生，有為事中，心無所樂。
見歡樂人，當願眾生，常得安樂，樂供養佛。見苦惱人，當願眾生，
獲根本智，滅除眾苦。見無病人，當願眾生，入真實慧，永無病惱。
見疾病人，當願眾生，知身空寂，離乖諍法。見端正人，當願眾生，
于佛菩薩，常生淨信。見醜陋人，當願眾生，於不善事，不生樂著。
見報恩人，當願眾生，于佛菩薩，能知恩德。見背恩人，當願眾生，
于有惡人，不加其報。若見沙門，當願眾生，調柔寂靜，畢竟第一。
見婆羅門，當願眾生，永持梵行，離一切惡。見苦行人，當願眾生，
依於苦行，至究竟處。見操行人，當願眾生，堅持志行，不舍佛道。
見著甲冑，當願眾生，常服善鎧，趣無師法。見無鎧仗，當願眾生，
永離一切，不善之業。見論議人，當願眾生，于諸異論，悉能摧伏。
見正命人，當願眾生，得清淨命，不矯威儀。若見於王，當願眾生，
得為法王，恒轉正法。若見王子，當願眾生，從法化生，而為佛子。
若見長者，當願眾生，善能明斷，不行惡法。若見大臣，當願眾生，
恒守正念，習行眾善。若見城郭，當願眾生，得堅固身，心無所屈。
若見王都，當願眾生，功德共聚，心恒喜樂。見處林藪，當願眾生，
應為天人，之所歎仰。入裏乞食，當願眾生，入深法界，心無障礙。
到人門戶，當願眾生，入於一切，佛法之門。入其家已，當願眾生，
得入佛乘，三世平等。見不舍人，當願眾生，常不舍離，勝功德法。
見能舍人，當願眾生，永得舍離，三惡道苦。若見空鉢，當願眾生，
其心清淨，空無煩惱。若見滿鉢，當願眾生，具足成滿，一切善法。

若得恭敬，當願眾生，恭敬修行，一切佛法。不得恭敬，當願眾生，不行一切，不善之法。見慚恥人，當願眾生，具慚恥行，藏護諸根。見無慚恥，當願眾生，舍離無慚，住大慈道。若得美食，當願眾生，滿足其願，心無羨欲。得不美食，當願眾生，莫不獲得，諸三昧味。得柔軟食，當願眾生，大悲所熏，心意柔軟。得粗澀食，當願眾生，心無染著，絕世貪愛。若飯食時，當願眾生，禪悅為食，法喜充滿。若受味時，當願眾生，得佛上味，甘露滿足。飯食已訖，當願眾生，所作皆辦，具諸佛法。若說法時，當願眾生，得無盡辯，廣宣法要。從舍出時，當願眾生，深入佛智，永出三界。若入水時，當願眾生，入一切智，知三世等。洗浴身體，當願眾生，身心無垢，內外光潔。盛暑炎毒，當願眾生，舍離眾惱，一切皆盡。暑退涼初，當願眾生，證無上法，究竟清涼。諷誦經時，當願眾生，順佛所說，總持不忘。若得見佛，當願眾生，得無礙眼，見一切佛。諦觀佛時，當願眾生，皆如普賢，端正嚴好。見佛塔時，當願眾生，尊重如塔，受天人供。敬心觀塔，當願眾生，諸天及人，所共瞻仰。頂禮於塔，當願眾生，一切天人，無能見頂。右繞於塔，當願眾生，所行無逆，成一切智。繞塔三匝，當願眾生，勤求佛道，心無懈歇。贊佛功德，當願眾生，眾德悉具，稱歎無盡。贊佛相好，當願眾生，成就佛身，證無相法。若洗足時，當願眾生，具神足力，所行無礙。以時寢息，當願眾生，身得安隱，心無動亂。睡眠始寤，當願眾生，一切智覺，周顧十方。

淨空法師專集網站(簡)製作